

Date – 23/03/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Thla thar ni 21-a Aizawl Minicipal Corporation inthlan neih turah Political Party pathum ZPM, MNF leh Congress ten seat awm zawng zawng an chuh kim vek dawn.
2. Public Health Engineering Department leh Central YMA te huaihawtin, khawvel puma tui pawimawhna inzirtirna ni ‘World Water Day’ chu vawiin khan hman a ni.
3. Prime Minister Narendra Modia chuan West Asia-ah indona thleng mek mahse ramchungah energy lama buaina a awm lo tih Lok Sabha ah a sawi.
4. Assam, Keralam leh Puducherry Assembly inthlan atana nomination thehluk hun chu vawiin tlai khan a tawp.



ZPM ANNOUNCE CANDIDATES

Thla thar ni 21-a Aizawl Minicipal Corporation inthlan neih turah Political Party pathum ZPM, MNF leh Congress ten seat awm zawng zawng an chuh kim vek dawn a, inthlan campaign pawh ngawrh chhoh zel a ni.

ZPM Party chuan vawiin khan an Official Candidate a puang a. Vanapa Hall a AMC Candidate Puan leh Campaign Kick-Off inkhawm-ah ZPM General Hqrs President Pu Lalliansawta chuan an Party Candidate tur 19 te a puang a, Adviser Pu K. Sapdanga’n AMC Election Manifesto a tlangzarh a ni.

He hunah hian thusawiin an party Leader, Chief Minister Pu Lalduhoman thusdawiin Aizawl khawpui chhung rorel tu tur thlan a ni dawn a, chumi te rawngbawl tur chuan an inpuah chah a ti a, kalphung thar chu party dang ten zawi zawi in an entawn theih a rin thu a sawi a, tun hnaiah mimal inbeihna nasa mahse party dangte aia that zawk zel an tum a ti a , AMC inthlan a sawrkarna an chan chuan Aizawl khawpui Mipuite hian an hlawkpui hle ang a ti .

ZPM sorkar chuan Aizawl khawpui a hmangaih a, Aizawl khawpui cheithat na tur atan hmalak na hrang hrang leh hmachhawp tamtak an nei a, hemi ti puitling

tur hian AMC chu a pawimawh a, khawpui chhunga thuneitu an nih angin sawrkar nena kalkawp thei tur leh tangrual thei tur thlan chhuah a pawimawh a ti.



MPCC

Congress Party chuan vawiin khan Aizawl Municipal Corporation (AMC) inthlan lo awm tura an party candidate mi 19 an puang a.

Aizawla Lal Thanhawla Auditorium-ah Congress Party chuan AMC Candidate Puanna leh Party Manifesto Tlangzarhna hun an hmang a, Party President Pu Lal Thanzara chuan AMC inthlan lo awm tura an Party candidate te puangin, AMC-ah sum tam tak a awm chungin sorkarna changtu MNF enkawlina hnuaiah Aizawl khawpui chu chei that a ni chuang lo a ti a, ZPM MLA pakhat, Chief Minister Adviser ni bawk chuan Aizawl khawpuiah engmah dah tawh loh an tum thu a sawi bawk a ti a, ZPM kaihhruai sorkarin Mizoram khawpui Aizawl chu Thenzawlah a sawn loh nan Aizawl khawpui chei turin Congress chet chhuah a ngai a ti.

Pu Lal Thanzara chuan miten an sawi fo thin Assembly inthlanpui lo awm leh turah Congress Party an chak tawh mai ang an tih thin a lo dik chhoh tan nan, AMC inthlan lo awm turah hian Congress Party chuan result tha an neih a ngai a ti a, AMC inthlanpui lo awm turah hian Thlarau Thianghlim chu an chhuan tur a ni tih sawiin, tawngtaina nena hmala turin Party mipuite a sawm a, Party dangten candidate atana milar leh mi hausa an sawm chhuah laiin, Congress Party chuan khawtlang leh kohhran atana mi tangkai leh khawtlang inrelbawlinaa hmala thintute chu candidate atan an thlang tih sawiin, an party candidate te chu chhuanawm a tih thu a sawi bawk a ni.

Thlaleh April ni 21-a AMC inthlan lo awm turah hian Congress Party Candidate 19 zinga 9 te chu hmeichhia an ni.



AMC

Puan tawh angin, Mizoram State Election Commission chuan Aizawl Municipal Corporation inthlan vote thlak ni atan thla leh April ni 21 a ruat a, April ni 27 ah vote chhiar a ni ang.

Aizawl Municipal Corporation-ah hian ward 19 a awm a, heng zingah hian hmeichhiate tan a hauh bik ward hi paruk, ward no 2,4,5,11 leh 12 te a awm a, a bak ward 13 te chu candidate atana mipa leh hmeichhia nih theih ve ve na ward a ni thung a ni.

Kan corr report lo ngaithla ang.

Aizawl Municipal Corporation inthlan thla thar April ni 21 a neih turah hian tun dinhmunah ZPM, MNF leh Congress Party chuan ward zawng zawng chuh kim vek an tum a, BJP hian an ward chuh zat tur an la puang lo a ni.

Aizawl Municipal Corporation huam chhungah hian ward number 18-na chu AMC inthlan lo awm tur atana voter tamna ber ward a ni a, voter 29115 an awm a. Mizoram State Election Commission chhinchhiah danin, AMC ward number 18 na ah hian vote thlak thei hmeichhia 18,906 bakah mipa voter 10,209 an awm a ni.

AMC Ward chhunga voter tlemna ber ward chu ward number 8-na a ni a, AMC Ward number 8-na hian Armed Veng, Armed Veng South leh Chite veng te a huam a, ward number 8-na ah hian voter hmeichhia 3670, mipa 4305, a vai a belhkawmin 7975 an awm a ni.

Aizawl Municipal Corporation huam chhungah hian a veng bil ang a voter tamna ber chu ward number 2-na huam chhunga Bawngkawn Veng a ni a, Bawngkawn Vengah hian voter hmeichhia 3461, mipa 2981, a vai a belkhawmin 6442 an awm a ni.



WORLD WATER DAY

Public Health Engineering Department leh Central YMA te huaihawtin, khawvel puma tui pawimawhna inzirtirna ni ‘World Water Day’ chu vawiin khan hman a ni a,

Aizawl ah chuan Dawrpui Multipurpose Hall Chief Engineer Pu K. Zohminglana’n kaihruaia hman a ni a, PHE department-a thawkte bakah tui hna humhalh kawnga an thawhpui department hrang hrang leh CYMA, MHIP, MSCW leh YMA branch hrang hrang hruaitute an tel a ni.

He huna thusawitute chuan tui renchem nachang leh tui dah khawl nachang hre thar leh theuh turin mipuite a chah a, Central YMA President Pu R. Lalnggheta chuan Mizorama lui tui leh tuihnate humhalh a pawimawh takzet thu sawiin “ruihhlo do tluk zeta ngaih pawimawh ni se, tui hna ti bawrbangtute chu tu pawh ni se, do ngam a tul a ti.

Vawiina Aizawla World Water Day hmannaah hian, lui tui leh tui hnate humhalh tura thutiam chham rual niin, tui hna humhalh kawnga inelna hrang hranga ti thate hnenah lawmman sem a ni.

United Nations General Assembly 1992 chuan March ni 22 hi tui pawimawhna inzirtirna ni – World Water Day atan a puang a. Kum 1993 atang khan khawvel hmun hrang hrangah hman tan niin Mizoramah chuan kum 2012 atang khan hman tan a ni a, remchan zawkna avangin kumin WWD chu Mizoramah chuan vawiin hian hman a ni. UN hian kum tin thupui thlan bik a nei thin a, kumin thupui chu ‘Water and Gender’ tih niin, au hla chu - Tui hnianghnarna hmunah intluktlanna a awm thin -tih a ni.

Lunglei District Water & Sanitation Mission huaihawtin vawiin khan Lunglei DC Conference Hall-ah March ni 8–22 chhunga chawlhkar hnih awh Tui Kut, "Jal Mahotsav" hman zawh tak kharna hun leh World Water Day lawmna hun buatsaih a ni.

HED Lunglei Rural WATSAN Divison-a Sr Executive Engineer Dr ZR Thasangzualan a sawi danin Jal Seva Ankalan ah chuan Lunglei District chhunga thingtlang khaw thenkhatah an tui lak hnarah tui hna a tlem tial tial tih tar lan niin, in tina tui la pek kim lohte pawh an awm tih tar lan a ni. Jal Jeevan Mission (JJM) hnuaia in tina tui pe tura hma lakna (Har Ghar Jal) kalpui laia in dingte chu tui pek kim an nih thu tar lan a ni.

Ramngaw hi tui hna vengtu leh tipungtu bakah, tui tithianghlantu a nih avangin tui lakna hnara ramngawte humhalh a, ramngaw tihchereu loh bakah, thing phun belh zel tura hma lak a pawimawhzia sawi ho niin, hemi kawngah hian nasa zawka hma lak ni se, tih a ni a. Tui renchem leh ruahtui khawl khawm chungchangah te, department hrang hrang te nen thawk hova tui luang ral tur venna ruhrel hrang hrang siam kawngah te awmze nei zawka hma lak dan kawng zawn ni se, tih a ni .

Khawzawlah pawh DC Conference Hall-ah Khawzawl District Water and Sanitation Committee bultumin World Water Day leh Jal Mahotsav Pakhwada kharna hun hman a ni.

He hun hi PHE Sr. Executive Engineer Pu Liantluanga Chohte kaihhruaia hman a ni a, tui hna lo insiamdan te, ramngawin tuihna a siam dan te leh leilung awmdan a zir a tuihna pawimawh zia te tarlan a ni.

Hei bakah hian tui atanga natna darh thei chi hrang hrang te leh a inven dan te, faina leh thianghlamna atanga natna inven theih a nihzia te, kum 10 kalta chhungin Tualte khuaah Malaria natna hmuh a nihloh thu te tarlan a ni a, hei hian khaw fai a pawimawhzia a tilang ni a sawi a ni.

Chairman kaihhruainain tui leh thianghlamna kawngah thutiam sawiho a ni a, member lokal te chungah lawmthu sawiin hun tih tawp a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

VIKSIT BHARAT

Sorkar laipui Central Bureau of Communication, Field Office Aizawl, chuan Sesawng Mizoram Home Guards a Central Training Institute-ah hlawhtling takin Viksit Bharat@2047 chungchanga inhrilhriatna hun an buatsaih a.

He hunah hian MRHG & CD Centre Commander Pu F. Lahuapzauva chuan thusawin, Central Bureau of Communication chuan Sorkar laipui scheme hrang

hrang chungchang leh hlawkna an neih te mipuite hnena hrilhriatna kawngah an thawh hlawk hle a ti a. Viksit Bharat@2047 hmahlir chu a pawimawh hle tih sawiin, India in zalenna a chan atanga kum 100 a hnaih chhoh zel avangin khua leh tuite pawhin ram pumpui hmasawn din a nih theih nan hnathawh an nei ve theuh tur a ni a ti.

Political Science Lecturer Pi. Angeline C. Lalrinawmi chuan India chu kum 2047 ah ram hmasawn nih tir hman tura sorkar laipui hmalakna kal zelah zirna, economy, leh rorelna lama hmasawna hrang hrang te a sawi a. Right to Education Act, 2009 hnuaia hmalakna hrang hrang- SSA, RMSA, KGBV, leh Samagra Shiksha te hmangin ram pumah ziak leh chhiar thiam zat an pung chho mek a ti a. Kum 2023 khan India GDP chu cheng vbc nuai 149 a ni a, a thanna chu zaa 6.5 a ni a ti bawk. Heng bakah hian sorkar laipui hmalakna hnuaia mipa leh hmeichhe intluktanna, retheite dawmkanna, faina lama hmalakna Swachh Bharat, leh Green Revolution chungchangte a sawi bawk.

He hunah hian CBC Field Office, Aizawl atangin Lalginlen Lhouvum chuan thu a sawi bawk a, Do-Re-Mi troupe chuan ‘Viksit Bharat @ 2047’ thupui milin cultural skit an entir a, interactive session leh quiz competition te neih a ni bawk.



PM

Prime Minister Narendra Modia chuan West Asia-ah indona thleng mek mahse ramchhungah energy lama buaina a awm lo tih Lok Sabha ah a sawi. Vawiin khan West Asia buaina leh India dinmun chungchang Lok Sabha-ah sawifiahin Pu Modia chuan petrol leh diesel supply a pangngaiin rampumah a kal reng a ti a. India chuan metric tonne maktaduai 5.3 chuang petroleum dahkhawl a neih thu a sawi a. Metric tonne maktaduai 6.5 chuang chhek belh turin ruahmanna a kal mek tih a sawi bawk a ni. Pu Modia chuan buaina chu kar thum chung a awm tawh thu sawiin hei hian khawvel sum leh pai dinmun nasa takin a nghawng a ti a. Mipui nunphung thlengin nghawng a neih thu a sawi bawk a ni.



ELECTONEERING

Assam, Keralam leh Puducherry Assembly inthlan atana nomination thelulhun chu vawiin tlai khan a tawp a. Naktukah nomination paper te hi endik a ni dawn a. Tun kar Ningani thleng candidate te tan inhnudawhna hun hawn a ni. Heng state leh UT ah te hian inthlan hi thawhkhata neih tur niin thlaleh ni 9 ah vote thlak a ni ang. Nagaland a Koridang biala Assembly bye-election atana nomination thelulhun pawh vawiin khan khar a ni bawk a. Heng state leh UT inthlan vote tla te hi May ni 4 ah chhiar a ni ang.

